

呂碧城傳略

(一八八三—一九四〇)

周邦道

當代教育先進傳略稿——婦女之四

呂碧城，一名蘭清，字遁天，號聖因，安徽旌德（一作太平）人。清光緒九年癸未某月日生。父鳳岐，字瑞田，進士出身，歷任國史館協修，玉牒館纂修，山西省學政；返籍，寓居皖北六安。母嚴氏，為繼室。姊妹四人，行三。長姊清揚，字惠如，亦作蕙如；次美蓀，亦作梅生、眉生；妹坤秀。清末民初間，在奉天、吉林、直隸、安徽、福建等處，從事教育，皆以詩文聞於時。而碧城與兩姊尤俊慧；碧城且工繪畫，善治印，嫻聲律，嬌矜特甚。有「淮西三呂、天下知名」之稱，大公報主人英華、斂之，嘗為刊「呂氏三姊妹集」行世。

碧城自幼即熟讀四書五經。九歲，議婚汪氏；十二歲，喪父，侍母鄉居。舅司權塘沾，母命往依，欲入文學求新知，為舅所阻，乃專治國學。後赴天津，任大公報撰述。秋瑾所辦「中國女報」，為作發刊辭。樊樊山、易實甫等見其詩文

，稱譽有加。適母與人爭產，被擄，樊山任江寧布政使，碧城函請營救，得脫險。而汪氏忽藉詞退婚，碧城蒙此奇恥，遂矢志不字，潛心內典。

光緒二十九年癸卯，直隸總督袁世凱，努力新政，籌辦北洋女子公學堂，慕碧城名，延為總教習，尋升監督。時年僅二十一歲，是為我國教育史上，以妙齡女子長女學之第一人。不久，添設師範科，培養小學師資。惟風氣初開，學生多隨父兄宦遊，居處無定，故首屆畢業，僅十餘人。其校友錄序，有云：「滋蘭百畝，播吾道之芬芳；蓄艾三年，療庶物之疵癘」。彌見其興學苦心。課餘，從嚴幾道研究英國語文，曾譯「名學淺釋」。入民國，袁世凱任為公府秘書，籌安會起，即辭去。奉母滬上，經營商業，輒以所收益，捐助慈善事業機構焉。

丁母憂後，於民國九年秋渡美，入哥倫比亞大學習美術，兼任上海時報通訊記者。先後兩度

赴歐，法、義、英、瑞等國，均有其遊踪。依據佛理，倡護生戒殺及素食運動。著「歐美之光」一書，葉恭綽為署帙，各地紛紛重版，流傳至廣。另譯佛經若干種為英文。其菩薩蠻一闕云：「春雲將展薔薇戰。飛紅灑白花如霰。人事苦烽煙，椰厨翠釜哀！鬻刀慘萬戶，腥浪能漂杵！此恨幾時平？千年誓此生！」慈愍之情，溢於楮表矣。

抗戰軍興，碧城憂國護教，亟從瑞士滬返香港，住東蓮覺苑，弘法利生。任女子佛學院導師有年。三十二年一月二十四日病逝，年六十一。遺命火化，骨灰和麪為丸，投入海中，與水族結緣。所著，尚有信芳集、鴻雪因緣、文史綱要、美利堅建國史綱、觀經釋論、雪繪詞、曉珠詞、香光小錄等書。

(本曹敬三：呂碧城居士生平概略，中國近代學人象傳初輯：呂碧城女士傳略。)